

宋史新編

宋史新編卷一百四

列傳四十六

明南京戶部主事莆田柯維騏著

蔚昭敏

高化

周美

閻守恭

孟元

劉謙

趙振

子珣

張忠

范恪

馬懷德

安俊

向寶

蔚昭敏字仲明祥符人父興龍尉都虞候昭敏在真宗時歷貝州行營兵馬都監定州行營鈐轄又爲鎮定高陽關三路先鋒累有破契丹功遷至殿前都指揮使保靜軍節度使卒贈侍中

高化字仲熙真定人少不事耕稼學擊劍善射應募留

楊業戲下使捕賊酋大鵬翼獲之後隸禁軍選爲襄王
牽羈官累遷天武右廂都指揮使蜀州團練使天聖六
年夏大雨命護汴堤時夏守恩方典軍積材木城隅化
盡取塞堤乃得無患歷鄜延涇原真定高陽關諸路副
都總管遷至殿前副都指揮使歷建武軍節度使以老
辭管軍改武安軍節度使知相州部有大獄化疑之移
訊果出無罪者三人踰年復告老以右屯衛上將軍致
仕卒年八十贈太尉諡恭壯

周美字之純靈州人少有材武隸朔方軍後隸禁軍真
宗幸澶州美慷慨自陳願假數騎縛契丹將致闕

壯之常令宿衛歷廊延路兵馬都監賀州刺史初美自
靈武來上其所服精甲詔藏軍器庫至是加飾黃金遣
使卽軍中賜之加本路鈐轄遂爲副總管遷至副都總
管召還授耀州觀察使又進馬軍副都指揮使卒贈忠
武軍節度使諡忠毅自陝西用兵諸將多不利美前後
十餘戰平旌帳二百焚三十一招內附者十一族復城
堡甚多每邊書至諸將各擇便利獨美未嘗辭難然所
向輒克諸將以此服之祿賜悉分戲下及死無餘貲
閩守恭弁州人聞都巡檢使郭進有寵太宗慨然曰進
不遇主亦行伍爾吾自度豈不及進邪遂應募隸拱聖

軍擢殿前押班咸平中累遷左第二軍指揮使乾州刺史明道中落軍職以德州刺史爲永興軍兵馬鈐轄徙并代路守恭性沉勇御軍嚴雖家居如對賓客常訪求士大夫取郭進事而師法之所得奉祿悉散予人在并州因春社會賓客曰守恭太原一貧民爾徒步位刺史老復官鄉里踰分多矣今日與卿輩訣後十日卒

孟元字善長洺州人性謹愿喜讀書少隸禁軍由殿侍歷并代高陽關真定大名諸路鈐轄又歷諸路副都總管遷至馬軍都虞候卒贈遂州觀察使元在大名也平貝州王則實預有勞又嘗權知滄州民鬻鹽爲生歲荒

多不售元度軍食有餘悉用易鹽民賴以濟云

劉謙字漢宗開封人少補衛士遷至博州團練使環慶路馬步軍總管兼知邠州謙不讀書然聞訟曲直皆區處當理前守者多強市民物以飾廚傳謙獨無所撓邠人愛之夏竦奏爲涇原路總管以破賊功擢龍神衛四廂都指揮使象州防禦使卒贈永清軍觀察留後

趙振字仲威雄州人真宗時起卒伍爲邊將仁宗時累功擢至捧日天武四廂都指揮使初爲慶州沿邊都巡檢使時金湯李欽等三族悍難制振募降羌唱以利令相攻破十餘堡欽等詣振自歸振爲置酒取細仗圍射

數分植百步外共射欽等百發不中振十矢皆貫欽等皆驚誓不復叛及爲郿延副都總管知延州代范雍會元昊寇塞門砦按兵不救被圍五月才遣百餘人赴之砦遂陷將士皆沒振坐貶官潭州安置累進博州防禦使改解州致仕復起爲左神武軍大將軍卒振剛強自負喜謀畫輕財尚氣衆樂爲用子珣瑜皆工騎射珣初試便殿授三班借職景祐中復召試又試策畧于中書得進秩未幾除濠州兵馬都監初珣隨父在西邊訪得五路徼外形勝利害作聚米圖經五卷詔取其書并召珣至又上五陣圖兵事十餘篇陳執中薦爲緣邊巡

使呂夷簡宋庠又薦擢通事舍人招討都監珣自以
少新進辭都監授兵萬人御賜鎰仗令自擇偏裨叅佐
居涇原兼治籠竿城麻氍党留百餘帳處近塞爲暴珣
白府引兵二萬自靜邊歷揆吳抵木寧襲賊俘獲數千
計靜邊將劉滬殿後爲賊所掩珣登阪望見從騎數百
復入拔滬之衆以出膳氍居龕谷無所屬珣與書招之
遺以綈綿遂聽命改本路都監詔追入朝將行適元昊
大入府檄留珣葛懷敏不聽其謀越界壕抵定川未及
陣夏人引鐵騎來犯珣與瑜戰甚力詰朝懷敏退走珣
遂被擒後卒賊中瑜以身免珣美風儀性勁特好學恂

陶類儒者贈莫州刺史瑜弟璞亦知名

張忠字聖毗開封人初隸禁軍累遷齊州團練使擢知
滄州鈐轄楊懷敏言其御下急徙澶州總管卒

范恪字許國開封人初名全亦起自卒伍康定元年元
昊數寇邊由禁衛選爲慶州北路都巡檢使累功被進
擢歷環慶路都監鈐轄權秦鳳路總管擢至侍衛親軍
馬步軍副都指揮使歷保信軍節度觀察留後以疾出
爲永興副都總管卒贈昭化軍節度使恪有弓勝一石
七斗其箭鏃如鐔名曰鐔弓羽間識官稱姓氏凡發
中至一箭貫二人臨難敢前故數有功

馬懷德字得之祥符人父玉東頭供奉官言懷德可
引弓擊劒角觝補三班奉職歷鄜延環慶諸路副都總
管遷至靜難軍節度觀察留後卒贈安遠軍節度使當
仁宗時西賊猖獗懷德數有戰功矢中顙鏃入於骨以
弩弦繫鏃發機出之韓琦范仲淹龐籍咸論薦焉其爲
鄜延都監也軍旅之後民多亡散懷德招輯有方梁適
奏請推其法於諸路云

安俊字智周其先太原人仁宗爲皇太子俊以將家子
謹厚選爲資善堂祗候及卽位俊歷環慶諸路都監鈐
轄總管其間歷知忻代滄涇數州虢原二州刺史遷至

侍衛步軍都虞候陵州防禦使卒贈閬州觀察使俊父
在邊差人識之環州嘗獲俘虜知州种世衡問之曰若
屬於吾將孰畏曰畏安大保指俊于坐曰此長髯將軍
是也

向寶鎮我軍人歷真定鄜延副總管遷龍神衛四廂都
指揮使嘉州團練使卒寶年十四與敵戰斬首二級及
壯以勇聞有虎踞五原卑邪州東西百里斷人跡寶一
矢殪之嘗至太原梁適授寶矢射之四發三中適曰人
之飛將也神宗嘗以比薛仁貴及死厚卹其家

論曰蔚昭敏而下皆真仁時諸將効勞邊鄙者固多

擇利而立功閭守恭御下嚴而能愛視張忠少恩趙
晚節怯懦優劣判如已振子珣兼習書史諳韜略籠竿
之戰大挫夏兵且從容拔殿將劉滄於死其後爲葛懷
敏所制師敗身隕亦足蓋前人之愆矣高化孟元劉謙
范恪馬懷德竝能加意民事平訟賑窮其惠甚渥第可
以武夫目乎安後爲西羌所畏向寶亦以勇聞惜無積
累功也

石普

張攷

許懷德

李允則

張亢

星

劉文質

子漢

趙滋

石普太原人幼給事晉邸以謹信見親補寄班祇候遷

至內殿崇班帶御器械李順叛普爲西川行營先鋒與諸將平之遷西京作坊使欽州刺史順餘黨復寇邛蜀僭王號普又爲西川都提舉捉賊使時蜀民懷疑多欲爲盜者普因馳奏蜀亂由賦斂苛急農民失業宜稍蠲減使自爲生則不討自靖矣太宗許之普遽還勝諭莫不悅服累遷洛苑使廣州團練使咸平三年王均叛以普爲川峽路招安巡檢使佐雷有終率諸將進討至天回鎮賊出拒戰普領前陣力擊破之賊退保益州王師圍城數月不下普繕車砲又爲地道攻城城破均夜半突圍遁普引兵追擊于富順監均自殺餘黨皆平遷

川團練使故事正任不兼帶御器械真宗特以命普
丹犯邊爲保州兵馬鈐轄北面行管押策先鋒歷定州
永興副都總管請立軍中傳信法又獻禦戎圖請設塹
陷敵騎并上所置戰械甚衆徙莫州總管歷拜河西軍
節度使知河陽徙許州築大流堰引河通漕京師上軍
儀條目二卷用將機宜要訣二圖時崇符瑞而普請罷
天下醮設以贍國用繇是忤帝意大中祥符九年上言
九月下旬日食者三又言商賈自秦州來言唃廝囉欲
陰報曹瑋請以臣所獻陣圖付瑋可使必勝帝以其言
踰分下普獄驗九月下旬日不食除名貶賀州徙房州

稍遷至左領軍衛大將軍仁宗立再徙再貶後以左衛將軍分司西京給官第居蔡州遷大將軍卒普倜儻有膽略凡預討伐聞敵所在卽馳赴臨陣善戰數有功頗通兵書陰陽六甲星曆推步之術太宗每厚遇之後以罪廢每歲太宗忌日必盡室詣佛寺齋薦焉

張洎開封人母入宮乳悼獻太子洎方在襁褓真宗以付內侍張景宗曰此兒貌厚謹視之景宗遂養以爲子蔭補三班奉職遷至供備庫使恩州團練使真定路兵馬鈐轄歷知莫貝瀛三州慶曆二年副富弼使契丹議論雖出弼洎亦安重習事以勞進秩累遷昭信軍

觀察留後馬軍副都指揮使孜長於宮禁中內外頗
疑似言者請罷孜兵柄乃出爲寧遠軍節度使知潞州
徙陳州仁宗以其無他復召爲馬軍副都指揮使御史
中丞韓絳又言宰相富弼薦孜請黜弼弼引咎求罷語
在絳傳諫官御史皆言進擬不自弼絳家居待罪曰不
敢復稱御史矣絳謫知蔡州而孜尋以罪罷知曹州卒
贈太尉謚勤惠孜初名茂實避英宗舊名改焉

許懷德字師古祥符人長六尺餘善騎射擊刺以父任
爲東西班殿侍累爲邊將擢至殿前副都指揮使寧遠
軍節度使會從妹亡無子懷德欲冒有其田事覺罷管

軍知亳州徙徐州歲餘復爲殿前副都指揮使祀明堂
進都指揮使更保寧進雄二節度年八十猶生于筋力
過人在宿衛十四年數乞身帝不許懷德曰臣年過矣
倘爲御史所彈且不得善罷詔爲減數歲卒贈侍中諡
榮毅懷德當元昊方熾連以畏懦謫已而與功臣竝進
典軍及得罪去而復還時遭承平故保寵終祿云

李允則字垂範謙溥子也以蔭歷供備庫副使知潭州
歲饑先發廩而後以聞明歲饑又如之所活數萬人初
馬氏暴斂州人出絹謂之地稅潘美定湖南計屋輸絹
謂之屋稅營田戶給牛歲輸米四斛牛死猶輸謂

骨稅允則請除三稅并減茶稅之半民便之畢士安嘗
薦其賢至是安撫陳堯叟疏治狀召還連對三日真宗
曰畢士安不謬知人者遷洛苑副使知滄州允則巡視
州境濬浮陽湖葺營壘官舍間多穿井未幾契丹來攻
老幼皆入保而水不乏斲冰代砲契丹遂解去帝復召
勞轉西上閤門副使鎮定高陽三路行營兵馬都監押
大陣東面請對自陳乏武藝不可當邊劇帝曰卿爲我
運籌策不必當矢石也賜白金二千兩副以幃幄什器
凡下諸路宣勅必先屬允則省而後行契丹通好徙知
瀛州又知雄州遷至東上閤門使獎州刺史允則以敵

情難測治城壘不輟契丹主曰南朝得無違誓約乎其相張儉曰李雄州長者不足疑也歲修禊事召界河戰棹爲競渡縱北人遊觀潛寓水戰隙地悉種榆久之榆滿塞下顧謂僚佐曰此步兵之地不利騎戰豈獨資屋材耶嘗宴軍中而甲仗庫火允則作樂行酒自若副使請救不答樞密院請劾不救火狀帝曰允則必有謂姑詰之對曰兵械所藏倣火甚嚴方宴而焚必姦人所爲舍宴而救事或不測又得謀釋縛厚遇之言燕京大王遣刺緣邊金穀兵馬之數因賜以金縱還未幾謀遽至出彼中兵馬財力地里委曲以爲報一日民有訴爲契

丹民毆傷而遁者允則不治與傷者錢二千衆以爲快
逾月幽州以其事來詰荅以無有蓋他謀欲以毆人爲
質驗比得報以爲妄乃殺謀雲翼卒亡入契丹允則移
文督還契丹報以不知所在允則曰在某所契丹駭卽
歸卒乃斬以徇歷客省使知潞州仁宗卽位領康州防
禦使卒允則不事威儀間或步出遇民有可語者延坐
與語以是洞知人情訟無大小而訊立斷善撫士卒皆
得其用盜發輒獲人亦莫知所由身無兼衣食無重羞
不畜資財在河北二十餘年事功最多其方略設施雖
寓於遊觀亭傳間後人亦莫敢墮至於國信往來費用

儀式多所裁定云

張亢字公壽自言後唐河南尹全義七世孫家于臨濮少豪邁有奇節事兄奎甚謹進士及第歷通判鎮戎軍上言趙德明死其子元昊喜誅殺勢必難制宜亟防邊因論西北攻守之計章數十上仁宗欲用之會以憂去既而契丹聚兵幽涿間河北增備遂起爲如京使知安肅軍因入對曰契丹主孱而歲歉懼中國見伐特張言耳非其實也元昊反爲涇原路兵馬鈐轄知渭州累進右騏驎使忠州刺史徙鄜延路知鄜州手疏事宜後多施用進西上閣門使改都鈐轄屯延州又奏邊機軍人

措蓋失宜者十事既而復詳明面陳利害不報會元吳玠
熾以兵圍河外康德興無守禦才屬戶豪也囉叛去導
夏人自後河川襲府州兵至近道纔覺而蕃漢民被殺
掠已衆攻城不能下引兵屯琉璃堡縱遊騎鈔麟府間
二州閉壁不出民乏飲黃金一兩易水一石時豐州已
爲夏人所破麟府勢孤朝廷議棄河外守保德軍未果
徙亢爲并代都鈐轄管勾麟府軍馬事築東勝金城安
定三堡置兵守之禁兵皆敗北無聞志乃募役兵敢戰
者夜伏隘道邀擊夏人遊騎比明有持首級來獻者亢
以錦袍賜之禁兵始慙奮曰我顧不若彼乎又縱使飲

博方窘乏幸利咸願一戰亢知可用始謀擊琉璃堡使
謀伏敵若芳草中見老羌方炙羊髀占吉凶驚曰明當
有急兵且趣避之皆笑曰漢兒皆藏頭膝間何敢亢知
無備夜引兵襲擊大破之夏人棄堡去乃築宣威砦于
步馳捍寇路時麟州餽路猶未通勅亢自護賞物送麟
州敵既不得鈔遂以兵數萬趨栢子砦來邀亢所將才
三千人亢以語激之士皆感厲會天大風順風擊之斬
首六百餘級相蹂踐赴崖谷死者不可勝計奪馬千餘
匹乃修建寧砦夏人數出爭遂戰于兔毛川亢自抗以
大陣而使驍將孫岳伏短兵强弩數千于山後亢以萬

勝軍皆京師新募市井無賴子弟罷與不能戰敵日

東軍素易之而怯虎翼軍勇悍亢陰易其旗以誤敵敵
果趣東軍而值虎翼卒搏戰良久伏發敵大潰斬首二
千級不踰月築清塞百勝中候建寧鎮川五堡麟府之
路始通會契丹欲渝盟領果州團練使知瀛州葛懷敏
敗遷四方館使涇原路經略安撫招討使知渭州亢聞
詔卽行遷引進使徙并代副都總管御史梁堅劾亢成
都市易奪引進使爲本路鈐轄及夏人與契丹戰河外
復引進使副都總管知代州兼河東沿邊安撫事范仲
淹宣撫河東復奏亢前所增廣堡砦宜使就總其事蕃

漢歸者數千戶歲減戍兵萬人河外遂爲并汾屏蔽復知瀛州加領眉州防禦使復爲涇原路總管知渭州因事屢降屢復終客省使眉州防禦使徐州總管卒亢好施輕財凡燕犒餽遺類皆過厚至遣人貿易以助費以此人樂爲之用馭軍嚴明所至有風跡民圖像祠之奎字仲野亦登第歷殿中丞通判瀘州罷歸會秦州虧鹽課數十萬事連十一州被詔往按還奏三司發鈔稽緩非諸州罪因言鹽法所以足軍費非仁政所宜行若不得已令商人轉貿流通獨關市收其征上下皆利孰與誤重禁壅閼之爲民病朝廷從之悉除所負又歷

中侍御史知滑州徙邢州母病割股和藥以進母愈其
後母卒廬于墓自負土植松柏服終累遷右諫議大夫
知江寧府還判吏部流內銓徙審官院知河南府初全
義守洛久洛人德之有生祠及見奎偉儀觀曰真齊王
孫也因復興舊祠歲餘以能政聞遷給事中歸朝京東
盜起加樞密直學士知鄆州數月悉捕平之奎治身有
法度風力精強其爲政吏不敢欺第傷苛細亢豪放喜
功名不事小謹皆知名一時子壽自有傳

劉文質字士彬家世在外戚劉文裕傳中初授左班殿
直累擢西京左藏庫副使歷知慶州李繼遷入寇文質

將出兵而官吏不敢發庫錢乃以私錢二百萬給車士
皆感奮遂大破賊徙涇州充麟州清遠軍都監又破賊
于枝子平咸平中清遠軍陷坐逗撓奪官雷州安置起
歷秦州鈐轄知代州先是蕃部獲逃卒給絹二匹茶五
斤卒皆論死時捕得百三十九人文質取二十九人以
赦後論如法餘悉配隸他州再遷內園使知邠州復徙
秦州鈐轄領連州刺史再知代州卒文質性剛喜評刺
於貴近無所避故不大顯于十六人渙渙皆知名
渙字仲章以父任為將作監主簿監并州倉章獻太后
臨朝父渙上書請還政觸后怒仁宗親政擢為右正言

郭后廢渙與孔道輔等伏闕爭之皆罰金會河東走

承受奏渙官舛州時與妓遊黜通判礪州尋知遼州歷
知邢恩董涇涇數州咸著威令遷至鎮寧軍節度觀察
留後熙寧中還爲工部尚書致仕渙有才略尚氣不羈
臨事無所避然銳於進取方開拓洮岷討安南渙旣老
猶露章請自效不報卒年八十一

涇字子濬頗知書傳深沈寡言有知略以蔭補三班奉
職累遷右侍禁康定中爲渭州瓦亭砦監押權靜邊砦
遷左侍禁韓琦范仲淹薦授閣門祇候西南去洛陽二
百里中有城曰水洛川平土沃又有水輪銀銅之利環

城數萬帳漢民之逋逃者歸之教其百工商賈自成完
國曹瑋在秦州嘗經營不能得滬進城章川牧善田數
百頃以益屯兵密說城上鐸斯那令內附會鄭戩行邊
滬遂召鐸斯那及其酋屬來獻結公永洛路羅甘地願
為屬戶戩即令滬將兵往受地既至而氏情中變圍以
數萬兵夜縱火呼嘯期盡殺官軍滬兵才千人前後數
百里無援滬堅臥因令長炊緩食坐胡床指揮進退一
戰以潰追奔至石門酋皆稽顙請服遂盡驅其衆隸麾
下以通秦渭之路又敗臨洮氏于城下遷內殿崇班戩
以三將兵討之士廉助築城功未半

四路招

使而涇原路尹洙以爲不便令罷築且召漚不聽日會
版趣役洙怒使狄青械漚士廉下獄氏衆驚收積聚殺
吏民爲亂朝廷遣使往視氏衆皆請以牛羊及丁壯助
工役乃復以漚權水洛城砦主城成終以違節制黜一
官爲鎮戎軍西路都巡檢復內殿崇班瘍發首卒居人
留其喪葬水洛立祠城隅歲時祀之經略司言得熟戶
蕃官狀願得漚子弟主其城乃命其弟淳爲水洛城兵
馬監押城中有碑記漚事

趙滋字子深開封人父士隆天聖中以閤門祗候爲邠
寧環慶路都監戰沒錄滋三班奉職滋少果敢任氣有

智略康定初以右侍禁選捕京西叛卒有功遷左侍禁
後爲涇原儀渭鎮戍軍都巡檢范仲淹韓琦富弼屢薦
遷至西上閤門副使歷知安肅軍保州滋強力精悍有
吏能所至稱治會契丹民數違約乘小舟漁界河中後
又遣大舟十餘自海口運鹽入界河朝廷患之以滋可
任徙知雄州滋戒巡兵舟至輒捕其人殺之輦其舟移
文還涿州漁者遂絕契丹因使人以爲言而知瀛州彭
思永河北轉運使唐介燕度皆以滋生事請罷之朝廷
更以爲能擢嘉州團練使遷天武捧日四廂都指揮使
英宗卽位領端州防禦使步軍都虞候賜白金五百兩

初再任未幾卒贈遂州觀察使滋性廉謹御軍有威嚴
繕治城壁樓櫓至於簿書米鹽皆有條法在雄州六年
契丹憚之契丹嘗大饑舊米出塞不得過三斗滋曰彼
亦吾民也令出米無所禁邊人德焉

論曰石普鷙而知兵兩平劇寇竟以輕議時事敗司刃
亡敢與知防信不可哉張洎安重無他長其獲譴胡足
惜許懷德器不踰洎乃能保寵終祿非幸耶李允則廉
約善籌畫守邊最久績最優趙滋其次歟張亢與兄奎
皆發身儒科著政跡劉文質死事之孤與二子渙滬各
自奮立功名而亢以將略稱渙以文階顯蓋兼才云

宋史新編卷一百四

宋史新編卷一百五

列傳四十七

明南京戶部主事莆田柯維騏著

劉平

弟兼濟
郭遵附

任福

王珪武英桑懌
耿傳王仲寶附

劉平字士衡祥符人父漢凝從太宗征河東討嵐憲州累遷崇儀使平剛直任俠善言馬讀書彊記進士及第歷官州縣有擊賊功寇準薦爲殿中丞知瀘州召拜監察御史數上疏論事爲丁謂所忌久之歷殿中侍御史陝西轉運使徙知襄州仁宗卽位遷侍御史歷環慶路副都總管進侍衛親步軍都虞候坐被酒破鎖八甲仗庫落管軍知同州上疏自列復爲步軍都虞候知澶州

又徙滄州副都總管呂夷簡爲相臺諫數言事平奏書
曰臣見范仲淹等毀訾大臣此必有要人授旨欲逐而
代其位者論者以謂希夷簡意也遷至邕州觀察使爲
鄜延路副總管兼鄜延環慶路同安撫使頃之兼管勾
涇原路兵馬進步軍副都指揮使靜江軍節度觀察留
後獻攻守之策疏奏未報屬元昊盛兵攻保安軍時平
屯慶州范雍以書召平平與石元孫合軍趨土門旣又
有告敵兵破金明圖延州者雍復召平與元孫救延州
平素輕敵督騎兵晝夜倍道行明日至萬安鎮平先發
步軍繼進夜至三川口西十里止營遣騎兵先趨延州

爭門時都監黃德和將二千餘人屯保安北碎金谷巡檢万俟政郭遵各將所部分屯范雍皆召爲外援平亦使人趣其行兵悉至將步騎萬餘結陣東行五里與敵遇時平地雪數寸平與敵皆爲偃月陣相嚮有頃敵兵涉水爲橫陣官軍竝進殺數百人乃退敵又蔽盾爲陣復擊卻之奪盾殺獲及溺死者幾千人平左耳右頸口流血矢日暮戰士上首功及所獲馬平曰戰方急爾各誌之皆當重賞汝語未已敵以輕兵薄戰官軍引卻二十步黃德和居陣後望見軍卻率麾下走保西南山衆從之皆潰平遣子宜孫馳追德和語以併力破敵德和不

從驅馬遁赴甘泉平遣軍校杖劍遮留士卒得千人轉
聞三日賊退還水東平率餘衆保西南山敵騎自山四
出合擊遂與元孫皆被執初德和言平降賊朝廷訊得
實德和坐腰斬而延州吏民亦訴平戰沒狀遂贈朔方
軍節度使兼侍中謚壯武後降羌多言平未死及元孫
歸乃知平戰時被執後沒于興州弟兼濟

兼濟字寶臣善騎射知兵以蔭累遷左侍禁廊延路兵
馬都監權知保安軍歷同提點陝西河東刑獄徙知龍
罕城夏人寇邊衆號數萬兼濟將兵千餘轉戰至黑松
林敗之屬兄平戰沒特授內殿崇班知原州入辭仁宗

曰國憂未弭家仇未報不可不力也徙寧州又徙鄜州
元昊旣稱藩徙梓夔路鈐轄又徙知鎮戎軍轉運使言
其嚴急多怨請徙諸內地改涇原路鈐轄復知寧州又
知原州徙冀州遷至西上閤門使管勾三班院卒

郭遵者開封人家世以武功稱遵隸軍籍稍遷殿前指
揮使歷延州西路都巡檢使元昊寇延州遵屬劉平遇
敵馳馬入陣殺傷數十人敵出驍將楊言當遵遵揮鐵
杵破其腦兩軍皆大呼復持鐵槍進所向披靡會黃德
和先潰敵戰益急遵奮擊期必死獨出入行間軍稍卻
卽復馬以殿又持大稍橫突之敵知不可敵使人持大

綦索立高處迎遵馬輒爲所斷因縱遵使深入攢兵注射之中馬仆地被殺特贈果州團練使四子尚幼仁宗賜名忠嗣忠紹忠裔忠緒官之遵用鐵杵槍稍共九十斤其後耕者得其器併與衣冠葬之弟達自有傳

任福字祐之開封人由殿前諸班歷忻州團練使爲鄜延路副總管管勾延州東路蕃部事尋知慶州復兼環慶路副總管聽便宜從事以功拜龍神衛四廂都指揮使賀州防禦使改侍衛馬軍都虞候慶曆元年春安撫副使韓琦行邊趨涇原聞元昊謀寇渭州琦亟趨鎮戎軍盡出其兵又募敢勇得萬八千人使福將之以耿傳

叅軍事都監桑懌爲先鋒鈐轄朱觀都監武英王球各以所部從福節制琦戒福等併兵白懷遠城趨得勝砦出敵後諸砦相距不遠糧餉便度勢未可戰則據險設伏擊其歸師福引輕騎數千趨懷遠城捺龍川遇巡檢常鼎劉肅與敵戰于張家堡南斬首數百敵棄馬羊橐駝伴北懌引騎趨之福踵其後謀傳敵兵少福等頗易之薄暮與懌合軍屯好水川觀英屯籠落川隔山五里約翌日會兵川口路遠芻餉不繼士馬乏食已三日追奔至籠竿城北遇夏軍循川行出六盤山下距羊牧隆城五里結陣諸將方知墮敵計勢不可留遂前格戰事

具夏國傳懌肅戰死敵分兵數千斷官軍後福力戰搶
中左頰絕喉與子懷亮俱死乃併兵攻觀英戰既合王
珪引兵四千陣于觀軍之西都監趙津將騎兵二千繼
至珪屢出略陣陣堅不可破英重傷不能視軍敵兵益
至官軍遂大潰英津珪傳皆死內殿崇班訾贊西頭供
奉官王慶侍禁李簡李禹亨劉鈞亦戰沒唯觀以兵千
餘保民垣四嚮縱射會暮敵引去與福戰處相距五里
然其敗不相聞也是時元昊傾國入寇福臨敵受命所
統皆非素撫之兵旣又分出趨利故至甚敗帝震悼贈
福武勝軍節度使兼侍中錄其子

王珪開封人拳勇善騎射能用鐵杵鐵鞭擢至禮賓副使涇州駐泊都監康定初元昊寇鎮戎軍珪將二千騎爲策先鋒敵圍之數重珪奮擊披靡叩城中請益兵不許惟縋糗糧予之師旣飽因語其下曰兵法以寡擊衆必在暮我兵少乘暮擊之可得志也復馳入有驍將持槍直珪胷而傷右臂珪左手以杵碎其腦繼又一將復以槍進珪挾其槍以鞭擊殺之敵遂引去仁宗下詔暴其功以厲諸將是歲改涇原路都監明年爲本路行營都監勒金字處置牌賜之使得專誅殺會敵大入以兵五千從任福屯好水川連戰三日諸將皆敗任福陷圍

中望見麾幟猶在珪欲援出之軍校有顧望不進者斬以徇乃東望再拜曰非臣負國臣力不能也獨有死報爾乃復入戰殺數十百人鞭鐵撓曲手掌盡裂奮擊自若馬中鏃凡三易猶馳擊殺數十人矢中目乃還夜中卒鎮戎之戰以所得二槍植山上其後邊人卽其處爲立祠贈金州觀察使錄其子光祖光世光嗣

武英字漢傑太原人父密隨劉繼元歸朝仕至侍禁鎮定同巡檢與契丹戰没于望都錄英官歷遷禮賓副使兼涇原行營都監與任福合諸將戰張家堡斬首數十百敵棄羊馬僞遁諸將皆趨利爭進英以爲前必有伏

衆不聽已而伏發福等旣敗英猶力戰自辰至申矢盡
遇害贈邢州觀察使錄其子永符永孚永昌永錫

桑懌雍立人膂力過人善用劍及鐵簡有謀略其爲人
不甚長大與人接常祇畏若不自足語言如不出其口
卒遇之不知其勇且健也兄慤舉進士有名懌以再舉
進士不中徙居汝潁間耕龍城廢田以自給諸縣多盜
懌自請補耆長得往來察姦因召里中惡少年戒曰盜
不可爲吾不汝容也累以捕盜功補郟城尉天聖中移
澠池尉有宿盜王伯者尤爲民害朝廷每授巡檢使必
疏姓名使捕之懌至官巡檢僞爲宣頭以示懌牒招致

之懌不知其僞也因挺身入賊中與伯同臥起十餘日伯遂與懌出至山口爲巡檢伏兵所執懌幾不免懌曰巡檢懼無功爾卽以伯與巡檢使自爲功巡檢俘獻京師而懌不復自言朝廷知之爲黜巡檢擢懌右班殿直永安縣巡檢明道末京西旱蝗盜起樞密院召懌授以渠魁名姓懌部分軍士盡擒諸盜其尤強梁者懌自馳馬以往士卒不及從惟四騎追之遂與賊遇手殺三人凡二十三人者一日皆獲還京師樞密吏求賂爲致閣門祇候懌曰用賂得官非我欲也竟除兵馬監押未行會宜州蠻叛殺海上巡檢官軍不能制因命懌往盡手

殺之還乃授閤門祗候懌欲讓其賞於位在已上者曰
母令疑我蓋其功而自伐也或譏以好名懌嘆曰若欲
避名則善皆不可爲矣益辭之不許遷至內殿崇班廊
延路兵馬都監踰月徙涇原路屯鎮戎軍與任福遇敵
好水川力戰而死贈解州防禦使

耿傳字公弼河南人祖昭化爲蜀州司戶參軍盜據城
欲脅以官昭化大罵至斷手足不屈而死傳少喜俠尚
氣初以蔭爲三班奉職歷通判慶州會元昊入寇參任
福行營軍事遇敵姚家川諸將失利敵騎益至武英朱
觀以傳文吏無軍責皆勸傳避賊傳指顧自若被數創

死始傳與觀營龍落川夜作書遺福戒以持重自寫題
觀名以致福軍中傳死後韓琦得其書奏之贈傳右諫
議大夫官其子瑗瑒璋珪琬

王仲寶字器之高密人爲縣尉累有捕盜功擢王巡檢
使積官內殿承制天聖初知鎮戎軍改供備庫副使破
康奴族詔獎之累遷四方館使領濮州團練使爲涇原
路總管安撫副使兼管勾秦鳳路軍馬事與西羌戰六
盤山俘馘數百人任福大敗好水川別將朱觀被圍姚
家堡仲寶拔觀出圍乘以從馬時諸將皆歿獨仲寶與
觀得還徙環慶路副都總管知慶州未幾兼本路經略

安撫招討副使破金湯城徙潭州副總管安撫使明年
以磁州防禦使知代州除左屯衛大將軍致仕卒

論曰仲尼贊徹桑之詩爲知道觀劉平任福輩相繼戰
沒豈不徵哉自太宗眞宗弭兵和戎之後君臣第賞花
賦詩講求禮樂以飾太平延及仁宗文致日臻武備益
弛故元昊得以乘間肆侮遂成陵夷之勢有國者鑒哉

景泰

王信

蔣偕

張忠

郭恩

張岳

張君平

史方

盧鑑

李渭

王果

郭諮

田敏

侍其曙

康德興

張昭遠

景泰字周卿普州人進士起家歷尚書屯田員外郎通判慶州上言元昊雖稱臣恐包藏禍心當備不虞三疏不報俄元昊反又上邊臣要略二十卷遷都官知成州奏平戎策十五篇會有薦泰知兵者召對稱旨換左藏庫使知寧州任福敗徙原州元昊入寇泰率兵從間道赴原遇敵彭陽西乃依山而陣未成列敵騎來犯泰陰遣三百騎分左右翼張旗幟爲疑兵敵欲遁去將校請進擊泰止之遣士搜山果得伏兵與戰斬首千餘級以功遷西上閤門使知鎮戎軍兼兵馬鈐轄久之領忠州刺史徙秦鳳路馬步軍總管卒子思宜忠州防禦使知

河州思忠左藏庫副使遂州駐泊都監繼死王事

王信字公亮太原人家故饒財少勇悍大中祥符中應募籍軍與其徒生擒劇盜七十人歷官西京作坊使知保安軍兼鄜延路兵馬都監始至之夕敵衆號數萬信領勁兵二千夜出南門與戰失其前鋒因按軍不動遲明潛上東山整軍乘勢而下擊走之獲首級馬牛居多累功拜感德軍節度觀察留後召爲步軍副都指揮使未至卒贈武密軍節度兼侍中

蔣偕字齊賢華州人幼貧有立志嘗割股療父疾舉進士累遷北作坊使歷潭州鈐轄知冀州因事再降知坊

州儂智高反除宮苑使韶州團練使爲廣南東西路鈐
轄賊方圍廣州偕馳傳十七日至城下戰士未集會儂
智高徙軍沙頭安撫楊政激偕焚糧儲退保韶州坐此
再降北作坊使忠州刺史命未至軍次賀州太平場賊
夜入營襲殺之贈武信軍節度觀察留後初偕入廣州
卽數知州仲簡曰君留兵自守又馘平民幸賞可斬也
簡曰安有團練使欲斬侍從官偕曰斬諸侯劔在吾手
何論侍從左右解之乃止卒以輕肆敗

張忠開封人初隸龍騎軍坐事配鼎州旣遁去爲盜復
招出隸龍猛軍以材武補官累遷廣東鈐轄領英州團

練使初智高圍廣州時都監察保恭及知州蘇緘以兵八千人據邊渡村扼賊歸路忠奪而將之謂其下曰我十年前一健兒以戰功爲團練使若曹勉之於是不介騎而前會先鋒遇賊奔忠手拉賊帥二人馬陷濘不能奮遂遇害官其子求壽求吉永德

郭恩開封人初隸諸班出爲左侍禁閤門祇候累勞補崇儀使爲秦隴路兵馬鈐轄徙并代州鈐轄管勾麟府軍馬事夏人歲侵屈野河西地至耕穫時輒屯兵河西以誘官軍經略使龐籍每戒邊將斂兵河東毋與戰嘉祐二年自正月出屯至三月然後去通判并州司馬光

行邊至河西白草平數十里無寇跡是時知麟州武戡
通判夏倚已築一堡爲候望又與光議乘敵去出不意
可更增二堡以據其地還白龐籍如其議五月恩及武
戡走馬承受公事內侍黃道元等以巡邊爲名往按視
之會訶者言敵兵盛屯沙黍浪恩欲止不行道元怒以
言脅恩夜率步騎一千四百餘人不甲者半循屈野河
北而行無復部伍比明敵騎四面合擊恩衆大潰夏倚
與推官劉公弼率城中諸軍閉門棄城武戡走東山趣
城東挾門以入恩道元及都監劉慶皆被執恩不肯降
迺自殺贈同州觀察使錄其子弟有差

張岳字子雲府州府谷人以貲爲牙將天聖中西夏觀
察使阿遇背約安撫使遣岳詰問岳徑造帳中諭以逆
順阿遇語屈留岳共食阿遇抽佩刀貫大轡嚼岳岳引
吻無所憚阿遇復弦弓張鏃指岳腹而殼岳神色自若
阿遇撫其背曰真男子也翌日又與岳縱獵雙兔起馬
前岳發兩矢連斃之阿遇驚服遣岳馬橐駝悉歸所虜
州將補爲來遠砦主手殺僞首領奪其甲馬時年十八
名動一軍元昊犯鄜延詔麟府進兵岳以都教練使從
折繼閔破浪黃黨兒兩族射殺數十人斬僞軍主敖保
以功補下班殿侍三班差使歷麟府駐泊都監累遷洛

苑使前後數中流矢創發臂間卒

張君平字士衡磁州人以父承訓與契丹戰死補三班
差使殿侍黔州指揮使以破僚寇功遷奉職爲容白等
州巡檢又以捕賊功遷右班殿直以薦擢閤門祗候管
勾汴口建言歲開汴口當擇其地則水湍駛而無留沙
歲可省功百餘萬又請沿河縣植榆柳及瘞汴河流屍
悉從之天聖中兩爲滑州修河都監遷至西作坊使本
州鈐轄卒君平有吏材尤明於水利自議塞河朝廷每
訪以利害河平錄三子官華嗣其父職云

論曰莊周有言筋力之士矜難勇敢之士奮患然靡愼

寡謀詎易制勝彼景泰儒生王信統袴子乃能知兵持
重大挫西賊輕肆如將偕張忠宜隕軀於徭寇也郭恩
知難冒進實爲黃道元所怵宋以內臣預戎事豈良法
歟張昂臨白刃弗懼其免禍其立功皆幸耳張君平治
兵治水並優爲之蓋審勢度宜事異而術同云

史方宇正臣開封人自殿侍累功遷至西頭供奉官知
辰州兼沿邊溪洞都巡檢使徙夔州時富順州蠻田彥
晏寇施州方領兵蕩其巢穴遷內殿崇班改內殿承制
歷益州鈐轄徙秦鳳路遷西京作坊使

盧鑑宇正臣金陵人累舉進士不中授三班奉職監坊

州酒稅歷遷閤門祇候利州都監初繼遷聲言石隕帳
前有文曰天誡爾勿爲中國患鑑時爲承受入奏事真
宗問之鑑曰此詐爲之以欺朝廷也宜益爲備至是繼
遷陷靈武帝思其言特遷右侍禁知儀州州有制勝關
號險要繼遷欲乘虛襲取之放言將由此大入有詔徙
老幼芻粟于內地鑑曰此姦謀也且示虜弱搖民心卒
不徙已而賊亦不至再遷西頭供奉官知利州秋滿民
請留詔留一年累遷西京左藏庫使恩州刺史爲環慶
路鈐轄兼知環州改西上閤門使知秦州卒

李渭字師望河陽人進士起家爲縣簿累官至太常博

士會河決滑州上治河十策爲修河都監歷益利郾延
路兵馬鈐轄再遷四方館使寶元初元昊將山遇率其
族來歸且言元昊反狀渭興知州郭勸謀卻之旣而元
昊果反再降右監門衛將軍白波兵馬都監卒

王果字仲武饒陽人舉明法歷審刑院詳議官遷殿中
丞奏邊策試舍人院改衣庫副使知永寧軍歷知定州
兼真定路兵馬鈐轄叛卒據保州果坐多傷士衆徙知
密州又知忻州鄜州權秦鳳路兵馬總管遷西上閣門
使徙知滄州卒

郭諮字仲謀趙州人八歲始能言聰敏過人第進士歷

遷殿中丞知館陶縣康定西征諮上戰略獻拒馬槍陣
法擢判鎮戎軍會三司議均稅法知諫院歐陽脩言惟
諮方田法簡而易行詔諮與孫琳均上蔡縣稅居母喪
宰相呂夷簡薦起爲崇儀副使提舉黃御河堤岸歷知
丹利二州王則叛文彥博薦知冀州運糧助攻討賊平
徙忻州興水利置屯田轉運使任顥言諮有巧思自爲
兵械皆可用詔以所作刻漏圓楯獨轅弩生皮甲來上
仁宗嘉之除益州路兵馬鈐轄累遷英州刺史改鄜延
路許置弩五百募土兵教之詔立獨轅弩軍以西上閤
門使知潞州又作鹿角車陷馬槍請廣獨轅弩於他道

因上疏曰臣自冠武弁未嘗一日不思禦戎之計臣慶曆初經畫河北大水界斷敵疆其術也若設臣所創車弩助以大水取幽薊如探囊中物爾時三司議均田和召還諮陳均括之法四十條復上平燕議帝壯其言詔置獨轅弩二萬同提舉百司及南北作坊以完軍器諮嘗謂作汴乘索河三十六陂之流危京師請自鞏西山七里店孤嶺下鑿七十里導洛入汴可以四時行運詔都水監楊佐同往計度歸未及論功而卒

田敏字子俊本易州牙吏補易州靜砦指揮使端拱初以所部兵屯定州屢却契丹累功領涿州刺史王均亂

從雷有終敗賊於靈池山遷馬步軍都軍頭咸平中契丹入寇敏從王顯爲鎮定先鋒大敗契丹於遂城西羊山真授單州刺史後爲邢州兵馬鈐轄未幾從王超屯定州遇契丹于望都逆戰斬首二千級歷遷北平岩總管賜御劔聽便宜從事契丹復入寇與戰楊村敗之敏諜知契丹主去北平十里蒲陰駐砦夜率兵襲破其營帳契丹主大驚問撻覽曰今日戰者誰對曰所謂田廂使者契丹主曰其鋒不可當引衆去歷遷環慶路都總管坐受賕枉法左降旣而復舊職至儀州防禦使卒敏在邊二十餘年多戰功雖晚不自飭每優容焉

侍其曙字景升父種左監門衛大將軍曙以父任爲殿
前承旨改右班殿直咸平中歷遷左侍禁領東西排岸
司與謝德權提舉在京倉草場嘗於倉隙地牧牛羊爲
德權所訟真宗以問德權曰牛羊食倉粟邪曙聞而自
劾帝勉諭之它日召曙問汝才孰與德權對曰德權畏
法慎事臣乃敢於官倉牧牛羊是不及也人多稱之鄂
州按李琰獄三十餘人皆伏法琰辭連已所不快者數
十一人一切不問累遷西京作坊使惠州刺史知桂州徙
滑州遷西上閣門使徙鄆州提舉在京諸司庫務卒曙
爲人沈敏有幹略善論利害事朝廷數任使之

康德輿字世基洛陽人父贊元嘗以作坊使從曹光寶襲李繼遷獲其母妻擢崇儀使武州刺史贊元死真宗錄德輿三班奉職歷并代兵馬鈐轄管勾麟府路軍馬事有蕃部也羅爲殿侍求錦袍驛料德輿不與也羅頗出怨言後有譖也羅與賊通也羅無以自明乃謀附賊指揮張岳言也羅不可不殺時元昊屢入寇德輿不聽曰今日豈殺蕃部時邪賊果以也羅爲嚮導自後河川入襲府州蕃漢欲入城德輿閉門不納或降賊或爲賊所殺不可勝計賊旣圍府州德輿與諸將王元楊懷忠按兵不出戰德輿坐降尋復累遷西上閣門使領果州

團練使知冀州歷陳州鈐轄卒

張昭遠字持正滄州人父凝寧州防禦使契丹內寇凝與康保裔伏兵瀛州陷圍中昭遠年十八挺身掖出之擢左班殿直寄班祗候每出使還奏利害多稱旨累遷西上閤門使知雄州獻言歲會四榷場入中銀真宗謂輔臣曰先朝置榷場所以通貨非計貿易之利也歷領忠州刺史知成德軍遷四方館使浹沱河決壞城郭乃修五關城外環以堤民至今爲利歷步軍馬軍都虞候嘉州防禦使知代州召還改冀州防禦使罷管軍授左龍武軍大將軍昭州防禦使卒贈應州觀察使

論曰郭諮以書生達世務兼通戰略巧創戎具且有志
於平燕斯爲一世豪士侍其曙有治辨材數陳便宜亦
其流亞歟史方檣蠻寇巢穴盧鑑燭李繼遷詭謀王果
優刑名肅軍政張昭遠固城築堤爲民永賴其績各昭
如也時方備邊故不計田敏之瀆貨而錄其戰功元昊
橫不可遏李渭康德興並失制禦機會而德興棄民與
敵罪尤甚焉